

四庫全書

集部

欽定四庫全書

石倉歷代詩選卷四百八十三

明 曹學佺 編

明詩次集一百十七

鄭善夫

遊俠篇

長安逢少年意氣何昂昂
鳴鞭六陵坂先驅勢正強
戒途列萬騎一一羽林郎
鏡吹動地來颯沓若雲翔
面前

五花驄寶馬金絲韁腰間雙龍劍吳鈎飾英璜弄兒十
四五藉綺凝素光行行且游獵游獵及上陽張弧向大
漠忽墜雙飛鶴持歸平樂宴象筵歡未央借問此何誰
云是漢金張六年起卒伍一日傾侯王丈人天帝子出
入乘金閭揚聲重綸綉流燄燦朝堂逆鱗不可嬰太阿
手所將乃知朱門貴溢恩胡可量

佳人篇

青青孺畔蕉粲粲空谷女頭上金錯釵宛宛鸞鳳舞腰

間碧玉佩娟娟下蘭廡言采草中英不踐草上露新製
齊紈扇自障復自顧非無合歡被防身密如堵飄風吹
楊花夫君渺何許長恐時易沈裁悲以延佇

蘇惠娘織錦

仰看天上星環轉如車輪經緯自有度卑尊豈無倫憑
妾手中梭懃妾心上棼縱橫八百字反覆各成言妾心
方悔悟君心倘回旋

南山一株松

南山一株松衣被何嬋嫣上焉絕雲氣下者抵流泉季
秋零露沍百卉乃弃捐脩條抗回風况結霜霰緣附托
一得所斤斧那得前所以保容華閱歲乃百千紛紛蟬
居子豈知有大年

志士篇

河伯誇秋水未知東海深衆人尚雷同安識志士心志
士有苦心心苦道自舒上山思采玉入海貴探珠至寶
非外假真詮豈予誣獨行何涼涼闊遵沂周衢雖無凌

風翰騰此適國都升天而遊霧惕哉子大夫

擬古

勛名

闕

歎彼時運乖佳人處幽谷心思日如摧未
肝柴門閉盛年不克諧豈無合歡意蹇修孰與媒霜閨
雲被寒玉顏暗中頽翹首孤飛雁雖離令心哀

北山詩

東行寓遊蹤逸軌迷西還矧茲玄冥月翳翳風景昏非
無兒女懷所適山海觀陽厓遠陂陰壑注奔湍步雲

青峰頂搜括窮其源前有空明洞萬逕回巖巖駕言采
玉華將以遺所歡倏然雲霰集置身虛無間大道出死
生靜者見腑肝願招柱下史去入無窮門

送何仲默遊關中

登高望咸都送子過易水朔風何蕭蕭黃鵠逝未已殺
函列百牢涇渭亘千里西當太白窟代有隱君子長孺
用高義壺遂且遠舉古道存遺編睠爾托經始崦嵫下
西日翳翳風景昏虎豹扼九關廣利那復聞重華不可

悟聖智乃沈淪鷗鳶日連類鷓鴣遁其羣矢言引高步
行止遵時屯

放舟荆溪尋張公洞不果歸至渦湖起步長橋
望煙景放歌

日晷已東馳羈人復北征鼓舫下荆溪言訪張道靈緣
薄扼事艱意短迴脩程稠年戒襟素履茲荒志誠坐令
紫霞居遠秘干青冥所賴渦湖好煙景踈天聲蹶蹶騁
瞻眺稍慰滄洲情青鏡不肯私金聲幾時營寓形若流

電空懷紫金經

河上送鮑使君

柔風協河洲回飈被泗瀆賢軺指玉衡過門不停軸結
交何所將解我雙英鼓豈無錦繡段感彼並朽藁希君
復自愛勿使輜出櫝

秋夜遲王員外時行

涼風升寒節切切充重幃堅冰戒時至鴻雁明其幾春
滋淨不處秋隼方高飛監物沈幽志誰能不懷歸素月

臨丘榛灼灼澄員暉員暉豈不愛零露沾我衣遲我同
歸子濡滯尚安之呼琴為子鳴調苦使心違不恨歲載
徂但恨知音稀盈縮本恒理傷哉生別離

初離京邑留別諸同志

陳車遵城闈振策導廣路仰盼孤雲征俯見流波泝感
念平生懽豈以杯酒故羣居不自覺相失增怨慕川河
引舟揖陵陸曠煙霧重覲難可尋努力敷襟素

二

卷四百八十三
馳車太行坂北首入楚澤迷途不蚤悟困頓安所適爵
服載憂患趨者何充斥流俗日向靡胡為重濡跡京塵
復何長不見所緇白凡駘御文輿赤驥且辟易誰能違
衆好共整東山屐

憶李御史雲

憶昔在吳會與子共昕夕劇談倒百壺醉吃滄溟窄晨
光倏不處人事轉淒惻子復苦羈旅子已作逐客鄱陽
波浪深南岳瘴霧塞鴻冥天萬里帛書經歲得誰知消

息來竟作幽明隔，冥契既永逝。今我何蕭緘，曩時青蓮
花持抱。化為石，回首靈源山。雲際且屏迹。

須溪除日

茲夕乃何夕，忽忽歲云徂。南征歷寒溫，猶滯天一隅。去
年闔閭城，今年姑蔑墟。風塵久未厭，豈得念故都。懷中
兩兒女，旦夕如長鳧。出門初學語，今能效屠蘇。團藥豈
慰意，惻惻悲隙駒。比隣數如舊，別後還有無。爵服既不
情，鉛汞亦我誣。九野天浩蕩，奄奄正愁予。

汎舟五曲謁武夷精舍

朝汎碧浪溪夕宿隱屏下
洄湍激九折溯洑以東注
丹崖寫靈竒怪者莫可悟
豈伊神理秘諒有鬼物護
仙術非荒唐宣聖有矩步
溯流無窮門直以夫子故
依違尚友心蹇蹇恐遲暮
終當據昭曠睠此結桂樹

遊張公洞

阮籍懷廣途盧敖歷四極
尚慚壤虫隘或哭周道阨
伊余抱末衷迺泝二子迹
北遊費歲年東歸睠幽蹟
豈不

念窮路黃鵠有羽翮陽羨山水區西奠洞庭側岳靡靡
雜卉菌芝類盈尺昔有攝生者于此鍊金液空釜夙所
慕靈洞杳莫測寒泉滴不散千歲成瑯碧中有科斗書
漫滅不可識竭來事實探宛若藐姑射豈伊耳目娛但
恐霜露迫緬思縞鳳吹倘值紫髯客修觀竟十二累累
及八百深功諒難期所志未忍息永服先聖訓至誠裂

金石

題集山書院

大江貫靳黃中有碩士居抱壁重一擲探元破羣愚偃
卧大集陽悠然見蒼梧曾峰七十二芙蓉峻而都所戀
得依托寧能去園廬衆山止其巔百川求其渚不觀洞
庭闊但恐周道紆白鹿有筌蹄衡岳空芻芻玄玄入疑
始吾與爾為徒

送道夫赴闕兼懷何仲默

胡人且構患我友之朔方朔方萬餘里金門鬱煌煌下
有避世士大隱而誕章十年風塵深寂寞省中郎食祿

侏儒下修身思何長
我有薜荔裳因子遠寄將一以存
苦節一以昭不忘

宿石竹崑

寢疴坐情累削迹離故家
屆茲仲如月氣候清且嘉
迢迢紫雲洞渺渺天一涯
尋壑滯瀑流攀岑悟靈芽
千峰遞生態百草互吐葩
周覽蕩節物况乃凌紫霞
神仙髣髴遇導我營丹砂
丹砂未易營緇髮早已華
神理寓隱蹟時變增感嗟
至人有逸念存形非所多

玉輝堂詩

窈窕巖壑姿迢迢契幽蹟緬懷天台勝遂寄山水癖赤
城淹歲晏所戀有三益壯陰屈微陽關山雪盈尺雖嗟
軌路阻稍喜緇塵息巾峰入草堂天葩進疹瘵美人羅
公車求友意何極文筵麗竒態流觥樂無斃鹿鳴紛諧
和造適非絲革退念兼與葭幸茲附圭璧覩空悟氣機
體有見真色吾道未榛蕪驟然露胸臆

塞下曲

胡馬渡瀧川將軍出酒泉彤弓白羽扇鐵騎紫絲鞭倚
是封侯相橫行徧六邊漢兵迷失道胡塵高漲天遇敵
飛狐北敵強師不全何時清大漠戲馬龍庭前

苦寒行

南冠丈人何偪仄惡風吹雲閉春色白梅陰多開苦遲
黃鸝口喑啼不得東方征輪斷無迹嗚呼彼蒼未肯回
天戎翻令絲絮專元功

兵馬行

越南諸州復召募衮衮盡赴姚源戍鉦鼓聲填滄海鼉
旌旗色閃扶桑樹櫓槍耀芒犯女斗虎豺也更能咆哮
部伍存亡不可知擣衣愁殺閨中婦天寒野營雪嵯峨
指墮未易親干戈幾時奏凱標銅柱願得將軍似伏波

麥斜行

今我不樂遊麥斜石田瑀草搖春華洞門玲瓏駭初見
細路窈窕行未涯是日春光正駘蕩黃鸝布穀聲相向
遠樹恣倩色已齊古木詰屈神猶壯巖下山翁供酒脯

賞心豈復憂行厨雲端倘遇林樵容為爾分張石室書

玄明宮行

君不見玄明宮中聚金碧云是權璫結真宅貝闕憑陵
上帝居彤臺照耀長安陌銅龍鑄虎歛飛動至今赤日
風雲黑崖壑天開朔漠搖鯨鯢日吼滄溟仄探竒祗見
靈怪集矯首翻詫星辰迫西國祗園應渺茫六朝蕭寺
空千百白龍胡為作魚泣想爾當年勢輝赫土木經營
動四方珍竒聯絡來重譯分明造化出其手左揮右霍

何不得欲將燕市作蓬山便有神人為驅石奸雄到死
竟不悟驕奢之末無終極氣數相乘可自由李猫趙鹿
空回頭君不見大市街頭權倖路古來齏粉誰曾收

南唐後主畫竹引

君不見彭城彭奴元姓李早入徐家稱帝子又不見九華
山下齊丘生晚入南唐作謀士同時契合風塵裏草昧君
臣若魚水淮北初收格鬪塵宮中漫得丹青理昇元閣上
寫墨竹翠葆蕭森鳳毛起手書珍重表恩殊御墨淋漓濕

桑梓世代相催猶夢幻金陵畫餅寧復爾帝王從古多好
手人物絢素無不有前有殷武丁物色惟傳傳巖叟後有
宋道君鷹犬驂騮歛飛走丹青意氣稍或別治亂興亡一
回首彭奴彭奴聽我歌淇水才賢本衆多但惜九華山不
似傳巖阿吁嗟乎竹花零亂歲蹉跎鳳凰不來將奈何

寓舍為雪山奉續方薛二子之作

君不見南宮少谷老麻鞋布褐色枯槁萬事都歸混沌
裏一生但結江山好未即乘牛函谷關尚須跨馬長安

道長安歲暮雪滿城
甃雪便築山崢嶸
巖巖居地虎豹
急星躔轉斗山河
明玉女峰前瑤作臺
夸娥一夜輕移
來袍笏真當米芾拜
詩篇屢荷鄒陽裁
階墀把玩已兩
月皓氣遙遙正相得
塵土誰分冰雪姿
市朝聊寄煙霞
癖未防頹落旋補葺
時見消融勢尤岌
嘯月長聞白鶴
回含風豈恨青陽及
青陽青陽謾相放
金石填填本波
浪適來天地入虛無
何事么麼論消長

南關

度隴心忽折殊方梅柳春兵戈近滿眼書劍老隨身世
有阮籍淚道應原憲貧愁聞更選士東土已風塵

金山紀遊二首

雙眼無空闊長江會百靈吳門對海定淮樹貼天青鐘
動鼉鼉窟雲生鸛鶴庭中流有孤志鼓柁下滄溟

瀟瀟中泠水東遊與散愁樓臺通海霧歲月送江流好
事憐司馬逃空想惠休獻花綠尚淺心折過揚州

此夕

時危長伏枕月好自臨關
斥堠連吳越煙塵犯海山
民窮久欲亂師老未成班
此夕姑蘇酒酣歌不破顏

雙雁

雙雁為人得階前相向鳴
已辭關塞遠猶帶網羅驚
宦情一片影客淚五更聲
側目窺秋隼風煙異性情

發京邑迷路投宿黑庄

東省多年病南冠百念灰
關山一悵望天漢獨歸來
行野蒲稗晚過村笳鼓哀
迷途更幾許愁絕望鄉臺

悼劉宓

宓也歸何處營魂不可招只疑天地濶竟作死生遙苦
海風濤壯炎方罔雨驕傷心卧佛寺秋雨自蘭苕

臘

南州不待律臘後暖相催久客惜殘歲他時聞落梅豪
家斗酒會何處短筇哀却憶江西北漁樵戍未回

即事

即事春相近回船日自操微雲留朔雪久旱失溪毛衢

府風煙改常山斥堠高危途疲繭客汨汨向蓬蒿

送王叅伯赴闕

大叅行赴闕興落富春前六月樓船雨千山傳馬煙白
雲留故國綵服媚南天知爾寧親後屏營金鑑篇

汨汨

汨汨傷秋鬢依依欲暮年釣磯滄海上布被白湖邊避
地親朋棄憂時夢寐牽無家杜陵老且結草堂綠

至日

至日風色好粵南霜信遙地卑饒瘴氣春近茁寒條汶
水昔獨往淮南誰見招林栖歲華晏難免鬢蕭蕭

宿象山西塢

亂木藏幽鳥清商集古城暝煙分野意山鬼習人聲未
把桐川釣聊為潁水耕巖栖備寂寞倘得遇初平

草堂

歲事日將晏草堂今苟完天風吟竹葉海月皓柴門藜
莧還高志經綸有故園何能謝貧賤氛祲在乾坤

寄林荊門

暮年滄洲客，慟哭向窮途。
春草生歸思，秋風慰病夫。
青羶後命達，白髮此身癯。
八月衡山去，期君出五潞。

鯉湖

到此意了了，春湖接未妨。
薄雲長戀洞，名草不辭香。
月到寒侵閣，灘聲夜近牀。
濯纓吾志定，東下接滄浪。

宿七里潭

無數灘皆惡，安恬獨此潭。
泝流心共澹，汲苦味能甘。
永

夜魚龍定空山鬼魅談高秋進蕭颯行役徧東南

登建州浮屠訪僧道林

浮屠秋獨立千里見氛祲水閣風長盛山城日易陰赤霞留鶴晚黃葉住僧深世事宜高卧空慚支遁林

觀雁宕龍湫

瀑布飛不徹大聲空谷哀青山下河漢白日莽風雷潭穩蛟龍定歲深鴻雁來方崑倚天畔吾志在崔嵬

北風

北風天際下舟楫夜相聞
白草懸胡月黃沙長塞雲
驚旂猶小隊虎旅盡高勛
崖崿睽乖久人今已勒文

滄洲夏夕

失意對蒲柳滄洲昨夜風
野雲依暮笛客况近秋空
司馬多年病虞卿薄暮窮
此生隨造物行止合飄蓬

晚秋直南省二首

南宮秋晚直更鼓不勝殘
鴻雁夜仍度風霜天正寒
宮車延北望越客滯南冠
三輔胡塵裏聞雞未敢安

清宵夢不徹鴉啼深樹間
羯胡同漢月陵寢在燕山
青草乘時長黃旂何日還
因風候邊使咫尺見天顏

月下聽王稚卿彈琴

昭文鼓綠綺六氣指間流
王子梅花思飄飄下隴頭
月華終勝雪商意自成秋
今夕西方夢佳人不散憂

弔劉蕡祠

自昔悲歌地劉生有墓祠
祇餘經世志况值諱言時
去國英雄盡還山事業遲
黃金舊臺北騷首動遐思

送人遊衡山

衡山開漢沔高者祝融峰羨爾為官地看雲長道容齋
居夢波浪冬日見魚龍定有冥栖客巢君紫蓋松

西山襟詩

春盡一到此散愁幽意繁西湖草已綠南國桂應蕃宮
殿浮今日山河控北門時艱羨飛錫來往給孤園

送人歸渤海

爾去秦臺上秦臺秋正繁城深渤海郡草歇樂陵原蓬

閣風雲至若華波浪翻看君有道氣早晚共騰騫

送人之惠州

名家叅政下獨覺仲容賢宦轍今何往卑棲此最便物
情滄海俗天氣百蠻煙祗近啼猿樹鄉心日夜縣

陳遂初進士邀宿蘋谷草堂夜觀西湖漁火

稅駕歸閩上尋山入浙中客情逢勝友東路任飛蓬夜
艇流漁火秋杯折渚筍巢由聖世事直北大明宮

新昌縣曉行

暝發新昌縣晨臨赤土隈
秋花隨地有渚雁與雲來
雜樹吹煙出前涇近照回
忽聞歌伐木行路興悠哉

風雨過南關

元亮東歸日長途菊正斑
寧辭彭澤米早得匡廬山
雨勢秋崩峽雲陰書扼關
回思鳳凰閣吾已得生還

謁太初墳

伊昔丘園隱風流誰似君
談詩振大雅抗志入高雲
宅擬王官谷山名太白墳
寥寥廣陵散定向夜深聞

明妃曲

明妃初出塞宛轉意何窮
上馬琵琶曲流悲入漢宮
自言妾薄命萬里去和戎
今日靡蕪草青青向隴中

出塞曲

黃金鑄鵠印白馬出榆林
瀚海行人絕陰山殺氣深
漢恩長北損胡騎日南侵
一唱丁都護三軍淚滿襟

彭城避地

朔水薊門誰問津
洪河波浪眼中新
孤舟此夜山城雨

短劍長年驛路塵
鄭宅有官無飽飯
杜陵多難每依人
飛書近報齊梁破
何地江湖托此身

吳閭

萬木蕭蕭河漢秋
吳閭斜日獨登樓
眼中禾黍茅茨怨
海上風塵笳鼓愁
一命未忘青瑣闥
幾時還問白蘋洲
燕然銅柱男兒事
漫倚青萍看斗牛

孤山寄太白山人

為問山人孫太初
交情歲晚莫教疎
孤山梅萼春相惱

滿地松苓日自鋤
江夏肯容禰處士
茂陵初卧馬相如
知君不廢苔溪釣
書帛能無寄鯉魚

八月二日

曲巷踈籬小院幽
荒村獨夜竹桐秋
星河正直消魂地
鴻鴈還過何處樓
卧病豈堪聞木葉
息機猶自着羊裘
碧霄萬里風雲氣
起凭危欄歌四愁

秋興

閭闔風吹庭樹柯
乾坤西向尚提戈
舊京芳草秋猶積

絕塞浮雲今奈何，不耐隱憂侵白髮。
竟將吾道付滄波，碧雞金馬非前日。
獨倚江樓聽棹歌。

湖上清霜淨柳條，南天九月氣蕭蕭。
歲寒蘭芷將無變，日暮豺狼迥自驕。
三輔尚淹王景畧，北庭終數霍雲姚。
風煙着處堪踈濶，白水青山每見招。

送吾惟可還三衢

昔年相逢胥水秋，今日重在閩山陬。
中間喪亂真憐汝，南鄙音塵不散憂。
別後山陽頻弄笛，花時荆楚一登樓。

旄頭尚直天西北何地巾車各自由

小至

小至風煙催氣候南州雲物變乾坤城頭梅柳青春早
海上魚龍白浪昏萬事艱難悲故國三年戎馬閉柴門
小山梁苑多才子漢水襄陽猶隱淪

秦陵詩

千株松檜鬱相迴永夜風生瀚海哀萬國昔曾瞻氣象
五雲空復護崔嵬古來鳳鳥長難至天上龍髯定不回

苦憶焚香賜第日報恩真愧濟時才

壽日成禮奉天門

初日鴉啼宮樹林奉天高殿氣駸駸衣冠况值千秋節
犬馬真懸萬國心白羽書來兵未解黃河水落歲時陰
龍旂鳳輦關山道邊事辛勤風雪深

上妙高臺

雲海冥冥望不迴鯨波東蹴巨靈開中天樓閣虛無裏
南國風煙江漢來世短動經多事日愁長况上望京臺

白門金鼓維揚卒落日空傳黃竹哀

訪遂初宿南高峰下

天末逢秋驪客心只看商意動高林
脩篁細葉迎風亂翠栝繁條傍石陰
江上釣緡青眼底年來淨業碧山深
東歸喜有王摩詰輞口柴門許獨尋

勝果寺秋懷

山寺行逢紅槿花江南風物望中賒
棘雲蘿月同秋事鴻鴈鷺鷥亦歲華
多病茂陵仍去國長貧杜曲尚無家

白袍黃帽從吾好歸去滄洲問釣槎

秋夜偕應黃二子宿靈巖天柱峰大雷雨作

日落風迴天柱陰峰前雲木正蕭森古堂衾枕秋鐙淨
永夜雷霆山雨深漠北不聞麟鳳信海濱空寄蕨薇心
結廬欲擬南陽卧抱膝長歌梁甫吟

雨後登天遊觀

幽探尚愛天遊觀石磴高盤松栝林鶴馭虹橋今斷絕
黃冠紫屐此登臨千峰雨迴玄冥濕列洞雲迴元氣深

便欲垂綸釣魚石鷓鴣立滿九溪潯

歲暮入江郎山尋訪周故人

江郎三峰開畫屏上有朗朗處士星
修淵將到壺丘子憤世却續南華經
松間相信鶴一隻洞口長生芝數莖
釣渭耕巖不違志乘桴余亦下滄溟

畬黃應期太常

聞君未罷滄溟釣余復歸耕綿上田
江東落日淹多夢燕市殘杯空昔賢
悵別喜承懸榻問離羣那寄卜居篇

越城西望無千里乘興還迴何處船

李忠定祠

千秋祠廟對樵溪丞相愁時日向西江漢已浮龍馬去
風塵遺恨鷓鴣啼傷心北狩誰相問極目中原他自迷
三疏留君見東澈人情天運苦難齊

答人問滄海

久作持竿客滄洲話獨真潮聲雄度澗海勢側分閩星
漢涵無地風雲變有神蜃樓開弱水鼇極斷河津失意

歌漁父離羣憶古人惟應白鷗鳥浩淼得相親

野江為舒國裳父作

徐穉藏身在南州卧不妨經年歌白石乘月下滄浪江
抱洪都府堂開輞口庄藍田種有玉磻水釣惟璜會見
蛟龍起俄驚鶴鶴翔無由相高志把贈芰荷裳

楚客

楚客望不返行坐楚天心荆門未可涉洞庭波正深

遊焦山

焦丘龍卧浪冥冥瓜步雲回海樹青風塵重問焦光洞
讀罷華陽瘞鶴銘

金陵

紫禁金門閉寂寥不聞清樂下丹霄高皇事業如天地
過客何須話六朝

竹枝詞

西澗西邊東澗東千山不斷萬山通謝豹見春啼出血
王孫上樹捷如風

昔余夢遊雁宕乘最高臺東觀海波浩蕩回望
萬峰蔚蔚雲際及登盤山歷歷如在夢中竦
然題句

昔年夢上百尋臺薄海鯨波天地迴四十九盤東向立
鴈山猶是夢中來

天姥行

山人住在天姥陰憶余曾登天姥岑雲樓雪磴參差起
下控桃源幾許深

逐客二首送劉伯儒侍御

黃衫白馬簇金臺
逐客飄飄去不回
莫向猿聲墮清淚
銅環推髻解憐才

尉佗城外泛雲槎
西望峨眉隔木華
若道日南天萬里
歸心一夜過三巴

送人之鬱林

蒼梧之峰雲萬盤
下控牂牁連百蠻
莫道蠻方非近地
日南南是漢關山

巴人曲

我看山色下青霄
白帝祠西巴路遙
二月巴江花爛熳
一聲羌笛為停撓

看花

山藤花開紅映衣
看山藉草遲遲歸
錦石無人溪水下
隔花刺船鷓鴣飛

陳侍御使廣

荆南巨海散溟濛
海上羅浮四百峰
炎瘴直須三尺雪

鯉魚先避五花驄

石倉歷代詩選卷四百八十三

欽定四庫全書

石倉歷代詩選卷四百八十四

明 曹學佺 撰

明詩次集一百十八

殷雲霄

餐梅

退食縣齋靜微雨亦復晴開樽梅花下啜醑泛其英殘
蒞自墜地更覺春草生重雲生夕暝江城鴻雁鳴兀坐

不忍去暫此息營營簿書非我事鞭笞非我情抱策未
歸去幽懷徒自盈

江陰道中

喬峰雲隱石曲岸風薄木歲暮厭脩途歸急驅征舳奔波江
上潮昏林日沈谷疎梅照前浦飢鳥啼遙陸理愜心不違感深
景仍觸勞悲豈堪訊真獨良亦足萬物滋情嘆狂歌誰為續

宿江陰得太初書

侵晨發毘陵薄暮及江陰積雪明高原歸鳥喧前林孤

舟風雨夕大江雲霧深遙遙越鄉感脉脉遊子心美人
隔江浦寤寐安可尋情至物有合離析領瑤音愛賞欣
自古慕羣悲獨今寄言狂歌客一樽待吾斟

聞太初出遊

江風散微雨重峰生遙碧林端浮新青梅
逆見殘白地僻諍訟簡吏散庭宇寂
煙水澹孤城齋閣坐成夕忽念同懷人
清光隔咫尺溪舟時載酒野步忽携策
靜躁心詎異寤歌聊自釋

七月雨壽處州劉使君

括蒼羅萬山土少石嵯峨地僻寡商賈尋丈耕陂陀况值風
塵起逃亡今已多存者悲徵稅行者泣負戈皇天久不雨
嗷嗷其奈何秋七月之交陰雲翳庭柯南山殷其雷北山
雨滂沱田家嗟有生老稚撫其禾欣欣喜相語茲雨理則那

送弟雲霓北歸

懷疴苦簿領抱歸心匪他中原猶虎豹南國多風波菽
水已久曠鴻雁各蹉跎冉冉歲云暮悲愴將奈何
奈何冰雪時子來慰我思相對乃非夢拭淚問所知笑

言陶佳月登臨賦新詩款曲踰三旬倏忽成分離

分離胡山陰飛雨灑征衣靡靡萬里途念子復當歸逝
言為誰感居情實自違遊子身尚強得以慰庭闈

庭闈空在望屯雲蔽層巒辛勤歸湏早勿畏朔風寒別
促豈不悲願言慰慈顏明年芳草節遲我當來還

來還亦此途自愛各異鄉風波阻道路冰雪被山岡條
爾風帆飛佇立空彷徨歸與息宴遊典籍有餘芳

清江浦候汪太倉叔厚

挂席介休驛泊舟清江浦水落蒲已稀日暮鳥知聚落
落星出雲冥冥天欲雨久客厭吳越前途憶齊魯懷歸
心方殷慕羣情莫與言念同行客昏黑宿何處漫漫淮
海徑蕭蕭寒霜渚獨酌詎為歡長謠亦復苦離會非我
期行止將誰主孤篷鳴續風寒燈翳復吐

長店

出京已三日長店猶淹留狂風吹潞河林木鳴颼颼江
離方出水慘淡河之洲我欲采其芳頰波蕩我舟左右

望春草涕泗緣纓流

夜登定山

泊舟桐江水夜登定山石延蘿踞虎豹嗟波動潮汐俯
關馮夷宮疑入羽人宅林靜江有聲雲昏岬無迹懷哉
生哀聽戚矣闕遠覲風勢依峰峻月色連江白飛鴻鳴
遠浦潛蛟舞深澤飄飄千里舟脉脉獨遊客飛帆拂溟
海逸思遶鳧繹乘桴嗟有志棲岩悲失策薄宦竟何有
幽期誰與適覺迷道有獲舍欲情無逆眷言詠白駒聊

以慰今夕

秋雨歎

秋雨蕭蕭秋風急
菊花慘淡色如泣
衰黃搖綠何嗟及
寒山木落蒼雲濕
霜霰懼爾難獨立
嗚呼繁絃長袖在
何許對爾臨風淚如雨

二

陰雲伏雨回秋光
病骨却愛秋風涼
杖藜高歌猶清狂
南歸鴻雁鳴且翔
我欲射之心悲傷
嗚呼歲暮山中人

未歸山中茅齋今是非

三

今年雨多不傷農村醪社鼓歌年豐漁父懶慢網罟空
長官病起深山中再拜為民祝華嵩嗚呼千倉萬箱安
能足山中今有逃亡屋

題桃花春禽

飄泊東南春已去孤帆未足三江路風濤暫泊錢塘潮
雲霧遙看富陽樹尋芳南屏來何遲春花落盡無殘枝

湖上浮鷗背我去巖畔枯梅猶自竒
王君馳圖開素封
黃鸝紫燕桃花紅似傷晚風嬌不語
應識春色來相從
故園花鳥偏憐余
三載干戈未有書
捲圖還之空嘆息
陶家蘭柳今何如

泊舟東同行徐掌科

河淺舟行澀如棘
南望道中悲行役
兩行楊柳青如染
百里湖光明可挹
湖邊漁翁頭不梳
清晨小舟來賣魚
同行不見論文友
隔岸猶尋賣酒壚
獨行芳草春如許

石磯雨過無塵土小童宦久能吳歌家山漸近聞齊語
湖中鷗鳥應憐吾似識當日舊陶朱歸來欲擬陶潛賦
客遊休作魯連書

梅夢

曉雨蕭蕭風淅淅梅花落地如白雪又如瑤草碎玉杵
漫翻石臼晞瓊屑幽興他時與誰期悲心今日覺彌切
巫陽卜筮空大招玉妃風神忽遠別既嗔虫蟻竊芳華
復慘泥沙污太潔吳綾魯縞茵重鋪殘蕊飛英時自掇

濯以甘露薦冰盤殮之朝腹充流吸申椒菌桂失芳馨
沆瀣飛泉漫清冽十日不飢麤穢除五內保和神明徹
清夜夢化梅花精縞衣跳入先天穴手探一元含物象
時出千卉從品列陽關陰闔自先機天心子半非空說
石階鐵龍覺處蟠草徑煙溪香未歇出門桃李爭春風
杖藜遶樹泣垂血

虎丘寺

落日青山外浮雲滄海邊江山皆勝迹樓閣自人天碧

草生公塔丹厓陸羽泉平生獨往志欲老翠微巔

舟過吳江寄方思道

宦遊安能住明發曉霜侵月沒寒江遠山昏細雨陰中原羣盜恨南國美人心回首崑山近蒼茫煙水深

靖江次方思道韻

層波孤湧地四際共浮天海霧常飛雨江潮自入田舟檣通百粵笙鶴近羣仙巧捷生幽恨沉冥得靜便

太初病酒以詩嘲之且招遊孤山

知君非病酒或者是詩魔清歌狂不了梅花可奈何春
風吹薜荔晴日睡鼃鼃君能復飲否携酒上嵯峨

桃花

青源柳葉短東昌桃花開暝色春雲淡悠悠鳴雁哀浮
名知是幻薄宦愧非才萬里滄溟水蓬壺安在哉

九日遊梵宗寺

胡山梵宗寺登高此日來泉聲鳴澗谷林木隱樓臺合
沓秋峰峻蒼茫海霧開黃花無意緒落日伴荒苔

秋郊

今日忽不樂，悵然歌式微。來遊荒野大，坐覺晚雲飛。秋
葉不相待，海潮空自歸。憑誰問所往，寂寞故人稀。

再遊梵宗寺次前韻

山僧迎我笑，長官今又來。秋風已衰草，古殿惟荒臺。高
歌碧雲合，不厭綠樽開。三秀在何處，殷勤問石苔。

遊金田

昨入胡口寺，今來金田山。莫笑簿書吏，常遊煙水間。雲

生遠嶂合葉落空庭閒林中有歸鳥浩歌吾亦還

魏丞蓮花開

列館招遠風疏渠引江水朱華冒清漣靜色媚芳芷
宓鞵生塵靈均泥不滓曰余勞簿領暫此協芳醴觀物
心自怡感時情靡已處煩常希寂居安故難恃河洛劇
虎狼荆棘暗桑梓推遷何寧期委順資神理

虎丘

澣野舟中日未曛虎丘山下雨紛紛前溪僧汲半江水

高閣客眠千頃雲湖山搖落風霜外鄉國蕭條虎豹羣
羈宦登臨聊復爾不堪行役更思君

無題

昨日花開今日風鳩鳴猶未見來鴻休憐金屋傷春早
試問銀河有路通捐珮空江思帝子浴蘭何處降雲中
杳冥未必知幽恨容與惟堪桂樹叢

九日得繼之書

病起重陽花正開高齋獨酌當登臺吳中此日來雙鯉

江上何時共一杯，萬里長風吹落木。
孤雲斜日照秋苔，百年懷抱憑誰盡。
滄海新收鼓角哀。

答繼之九日次韻見示

欲歸不歸空歲暮，淹留直為李陵臺。
白蘋老矣逢秋雁，黃菊蕭然漫酒杯。
草閣龍吟江上雨，蘭畦花沒徑中苔。
著書久抱相如病，作賦難窮庾信哀。

歲暮

吏退烏啼公事稀，南山坐對雲依依。
水生幽壑羣龍寐。

雪灑空江獨鶴飛
芳草向人已寂寞
梅花何意猶芬菲
故園松菊為誰好
歲暮山中人未歸

日暮

閒居潘岳苦職司
多病茂陵空支離
身不歸去欲誰與
邑有流亡翻自嗤
山中宿莽鳥雀怨
簷畔梅花冰雪知
寒江日暮美人遠
極目高原有所思

蓬萊宮

江風吹雨夜雲空
衆星爭泊天西東
狂龍歌舞晚潮外

芳草歷亂新晴中
宦情頗似勾漏令
生涯欲問浮丘翁
羣盜尚餘柴桑舍
故人空憶蓬萊宮

九日登混元峰

孤杖千峰病起時
江山如此更何之
三年奔走風塵暗
九日登臨草木衰
樽酒相逢人去遠
鄉書不至雁來遲
八溟秋色真寥廓
極目蒼雲有所思

又

去年獨酌臨滄海
今日相攜上翠微
寒菊向人如有待

故園何日可言歸
雲連溟漲三山遠
風掠巒嵒萬木稀
多病不堪頻北望
干戈空使淚沾衣

候王蕭山不至

十日狂風吹澈裘
堅冰塞道阻征舟
雪殘野岬憐春草
波靜芳洲喜狎鷗
千里鄉關歸漸近
百年奔走欲何求
繫帆把酒空懷子
斜日孤雲起暮愁

卧病縣齋

驅役猶堪松竹林
病來偏動故園心
烏啼短榻客初起

雲暗空齋山欲陰未鍊丹砂慚墨綬聊歌白雪寄瑤琴
東風走馬長安道芳草於今深又深

嚴陵瀨

我愧不如嚴子陵釣灘深處亂山青雲臺當日多王業
天漢千年自客星遺迹可憐開翠壁乘桴終去入滄溟
滿江風雨愁蘭柁吾道無勞問洞庭

過無錫簡侯南湖

別後音書自覺疎禪房花竹憶京都一官未去果何意

五載相逢猶故吾，江山應識狂歌客。
風雪難尋賣酒壚，奔走江南又芳草。
多懷聊復問南湖。

寄戴戶部仲鸞

醉後分携不記吾，晚宜堂畔費招呼。
人歸別浦江聲遠，鶴寐閒庭月影孤。
邂逅我堪懷叔度，風塵誰復問狂夫。
他時相憶還勞子，已約東溟舊釣徒。

下邳見山

過江以北不見山，今朝蒼翠落潺湲。
平生自是煙霞客。

出宰况居山水間芳草可憐春欲暮白雲應恨鳥知還
推篷把酒風塵道愧爾相看亦放顏

南旺道中柬徐掌科尹大行

夜雨既過無塵土芳草微煙亦可憐白雲欲去青山遠
鷗鳥似矜湖水妍平生事半風塵裏兩年歸在清明前
楊柳岬頭春幾許與君沽酒問漁船

送酒太初

一樽聊送解餘醒簷畔梅花芳鳥鳴風雨江城春夢遠

不須惆悵杜鵑聲

飲張簿宅

飛雁啼鶯向晚聞
江空煙淨酒微醺
不須遠望憐芳草
更與高歌落海雲

小桃源

海鯨吹雨風濤壯
山鬼被蘿石徑幽
寂寞江天雲霧裏
浩歌今日為誰留

徐州

彭城石下河水流
河風吹浪愁客舟
九里山前春草碧
晚帆風雨問黃樓

附

穆孔暉

聊城人
謚文簡

芳樹

芳樹易零落
日月更推遷
駕車騁騏驎
前途橫巨川
俯仰成寂寞
一身寄河邊
唐虞已千載
蓬瀛已渺然
傷哉吳市卒
無計入桃源
擬種東臯黍
難求負郭田
對此尊中物
哀此芳樹枝
瓊英與綠葉
西風隨所吹

楚妃嘆

嫋嫋葛盈谷芊芊草滿陂
君王與虞丘雲夢射熊羆
姬共九女深宮治綌綌綌
綌妾當服熊羆妾不食男兒志
四方君王事萬國縫裳亦妾職
逐禽非君力倉皇草樹間
恒使予心惻

寄王景爵

君有賢名傾海內薄雲高義失
今輩李膺豈但重通家
北海芳樽常不廢門外鳴騶
千里來瓊枝瓊樹常相對

楚客遙贄江離草衛豪思報瓊琚珮昔過劉更生接宴
會君情傾心無他意談笑碧雲橫佳樹流芳不動塵蘭
卮玉案冰壺清君有高樓復百尺綺疏臨流秋月白圍
筵子夜未能休傳觴投壺燈動席興來振歌追流雲簷
外疎梧翻露液主人自稱未能醉雞聲海色忽相迫此
時非羨行樂頻義氣真能驅古人喜施惟談馬伏波屯
澤誰憐石李倫城南燈火供兒課買書不厭萬軸新人
生百年如朝夕惟有賢者名不湮惠好難忘有寸心贈

言千里及芳辰

送劉瑞卿

夙好同氣雅交久契逾深
卽有婚姻申惠好更無意氣
見論心斷金雖喜芝蘭密倚玉終慙蒹葭質愛向班彪
談徹夜狂厭平原飲十日星斗森羅發續囊龍鸞迴翔
振華筆揚雄綴文或可能賈誼匡時我所驚武畧只稱
穰苴法竒才不讓魯連名月下吳鈞干彩宿風前寶瑟
徹蒼清只今四郊奔戎馬冤魂戰骨充函夏黃閣不聞

氣填膺白屋空悲淚盈把客子言歸念明發征衫起舞
雞聲月登高長吁思廟食弔古臨風歎芳歇憐芳誰解
停居諸幾回獨自詠虛徐東山不引安石屐西嶽思投
李靖書常懷報國終三箭還愛讀書窮萬卷庭徑那知
芳草深園林一任鳴禽變折麻寫意送君歸黃金臺下
炎塵飛市沽酒薄不能醉同心其奈苦相違月明遙寄
情脉脉夜深還有夢依依

有所思寄殷近夫

山斯滄水斯浪我所思兮壽之鄉西不渡河南不踰梁
乃在東一方泗水流其域岱岳立其傍青松百畝懸高
堂中有瑤琴曲思長曲思長不可忘千里共明月百里
同家鄉家鄉迫難得斯人安可望

上之回

回中道旌旗繚繞明枯草蕭關北鼙鼓逢逢振幽極朔
風吹萬馬雨雪凍千山長安路上傳清警六飛騰鑣自
代還匈奴何時滅神仙不可攀前年作得魚龍戲深宮

一宴開天顏

朱鷺

刷羽春塘寂騰身碧落遙碧雞非我友白雉任誰招
海僻丹霞滿崑深綠樹饒沙岼曝朝日蒲流戲晚潮

送李獻吉歸汴

西風送歸客倚馬共徘徊岐路揚朱淚江湖李白杯
秋高鴻欲盡霜重菊初開獨有梁園月能供作賦材

送謝應祥

送君費縣尹為政慕何人獨愛陽城拙無聞范叔貧蒼
生堪涕淚古道久逡巡城外桑麻路經過莫厭頻

青環閣留題在白學士香山別業

平野青無際橫空高閣寒追遊來別業登眺凭彫欄北
斗森相接西山翠可搏玉泉明遠虹金水瀉迴瀾村塢
千林積都城萬井攢風長來鼓吹塵暗走衣冠形迹寰
中倦襟懷物外寬雨晴荷氣徹日靜竹光團馬薤藤蘿
際鶉飛未黍端隙田開射圃曲几列騷壇况復池臺主

兼為翰墨官侍言親帝幕作賦動金鑾英俊皆登杼
愚蒙濫識韓深知一會易獨羨四并難愛此舒眉目渾
如生羽翰畫屏題淡墨絲戶綴深丹酒泛玻璃盞瓜浮
金錯盤冰蕤烹茉莉碧簟展琅玕絃奏高山調談傾下
坂丸寫懷知異撰乘興盡交歡時泰民無警官閒政莫
干山河萬里壯宮闕九重安物態浮沉是時名文字看
相期惜歲月各擬種芝蘭勲業心難負行藏鬢未殘閉
門恒寂莫出郭暫盤桓張弛明公意逍遙達士觀風光

願無改還此簇吟鞍

閱顧開封朝正稿

五馬清風自汴來六龍佳氣向春開
相如獨抱凌雲賦汲黯寧非治郡才
海內煙塵須慷慨江東花鳥莫徘徊
慙予疎懶無長句未得從容笑語陪

對雪

雪墮崇城曙色迷短簷平接暮雲低
茫茫大地千山合漠漠寒天一鳥啼
不訝薄衾涼似鐵獨憐高枕醉如泥

林間賸有堪遊處惆悵關河限馬啼

新鷺

出谷翩翩初弄時金衣已占最高枝
催花獨和東風早
棲樹應嫌綠葉遲
日暖龍池停玉輅
煙晴雀廈侑瓊卮
紅塵紫陌愁聽汝
柳市桃源負昔期

苦熱

赤日長天晝掩扉
冰紈碧簟起炎威
病餘未愛強加飯
客至還愁暫着衣
案上青蠅難寂寞
階前瑤草失芳菲

擬從禦寇乘風去却向山陰理棹歸

喜晴

久雨千家怨滯陰俄驚新照動高林江龍趨洞收殘力
海鶴盤空墮遠音煙薄松筠山色近窗寒鐘鼓月明深
來晨騎馬招朋輩把酒登高弄玉琴

春郊

流目春林表朝旭散清華鳥聲啼不盡芳草碧無涯

金陵雜詠

前朝舊事總堪悲
仙子王喬未可期
千載春江花月夜
幾回歌舞草離離

石倉歷代詩選卷四百八十四

欽定四庫全書

石倉歷代詩選卷四百八十五

明 曹學佺 撰

明詩次集一百十九

顧應祥

九日偕諸友登松雲後山絕頂復移酌洗心亭

曉歸值雨

塵紛役形神中抱頗作惡
睽茲重九日相携出西郭始

登松雲顛復移洗心酌披蓐陟層阿決皆入寥廓烟村
散如畫岡陵勢相絡欲雨天忽霽輕雲代張幕觥籌盡
餘興雅言雜詼謔百年幾佳序人事每相錯天錫茲辰
良胡不且為樂歸興西風暝雨脚遂紛落

丁未春社崑山張石川銀臺願米入社坦翁司

空以詩招之石川和之錄以見示次韻奉答
流光去不再往事安可追吾儕謝塵務生平况衰遲
茲溪山勝不樂將何之卓哉石川翁才名冠當時青春

命孤棹雅社懷英者曠達邁時俗古道遵皇義匪徒騁
遊觀真性日以頤滄桑有更變久要諒不移

戊申秋次吳苕源憲副韻

早歲罷官守歸田抱幽獨行行箸水濱采采籬下菊桑麻日以
長桃李亦穠郁羣賢挈高會千古振遐躅睠茲南城南絕勝曲
水曲上有千樹松下有萬竿竹梵宮出雲端澄湖枕山隩新構
復爽塏賓筵更雍肅業已謝紛華那復驚寵辱瓶罄復可酌
短繼以燭清歌月在天借榻雲滿屋疎鐘隔樹聞海氣開晴旭

次吳石岐大叅韻

藹藹諸吉士飄飄列仙羣同盟矢不爽雅會情何勤載
歌伐木篇言采南澗芹幽懷曠三古遐眺渺八垠弛張
合矩度討論俱典墳蓬麻交相資麴蘖寧徒醺憑軒看
逝水憩石候歸雲長空月初上爽氣秋將分西塞玄真子
茅山陶隱君安得與之遊理亂了不聞

遊道場山登絕頂次東坡韻

天風阻舟峴山麓促我來遊道場谷平生覽勝興獨豪飛步

寧愁病雙足松山鬱鬱雲漫漫石磴曲似羊腸蟠忽然谷底
天籟發千巖萬壑驚奔湍層梯歷盡浮屠出俯瞰平湖如廣
席湖中七十二峰青疑有巨靈一揮植相携何必雙綠鬟白雲明
月天地間丈夫適意即仙境浪說海外三神山浮世悠悠旦復
旦彈指百年過已半何如從此謝塵紛獨立丹崖發長嘆

歸雲菴次孫太山韻

千峰萬峰嵐氣飛松陰曲徑開禪扉虛室小坐羣動息
空山無人俗事稀清泉出渠忽自響野鳥狎客如相依

眼前幽意收不盡斜日看雲徐步歸

東原為汪道弘賦

東原山深深幾重千峰萬峰青龍從誰其主者風雪翁買
田築室于其中翁已蛻去迷仙蹤肯堂有子翁則同氣味瀟
灑文章工浪遊江湖西復東仰天長吟聲激空杪春訪我水
晶宮篝燈夜雨談鴻濛興闌長揖意氣雄飄然一棹凌天風

壺公謠

壺公山中興有餘山人愛聞頭不梳詩吟古人不道語

架插俗眼未見書有時乘興寫幽抱老蚌迸出千斛珠
雄才如此合廊廟早歸丘壑良可吁山人自言吾所好
不在珮玉金門趨曾聞世界常陷缺唾壺擊碎狂歌發
倦卧南陽岡上雲醉呼米石磯頭月閱殘塵世同蜉蝣
剖破藩籬同胡越年踰耳順筋力強時向風前晞鶴髮
舍南舍北俱種花客來剪韭還摘瓜開徑杖分黃犢草
携尊時對白鷗沙鷗沙犢草自成趣何用更覓仙人家

題高舜穆憲副所畫龍

黑颿橫吹海水立怒瞳閃閃雲中出三十六鱗煙燄飛
萬里鯨波一呼吸化為甘霖遍八埏坐令大地成奔川
湏臾收斂不知處風恬浪靜潛深淵

苦熱四疊韻答徐半谿

老夫病暑不耐夏口苦啖粥如啖炙雖無竹石富平泉
薄有草堂開魏野發狂欲叫轉炮焦習靜澄心亦瀟灑
洞庭一葦吾欲航河朔千杯誰共把野人贈我醒酒石
云是得之太湖者置之茅亭相對時清風徐來豈論價

園樹如經烈火焚，盆荷不見瓊珠瀉。世途已悟鹿覆蕉，
肉眼誰分珠與瓦。白首甘為抱甕迂，黑甜偷得浮生暇。
高槐細柳聊自娛，水閣涼亭底須假。代謝炎涼理則然，
吾徒莫更相驚詫。

宋駙馬王詵江山勝覽圖

王郎妙手絕代無，生綃寫出江山圖。飄揚天趣入三昧，
點染意象爭鎔銖。遠山模糊近山碧，澄江一帶橫秋色。
老樹參差曲岬妨，迴波搖蕩崩隄仄。人家臨水盡開門，

金少曰
卷四
百八十五
儼如雞犬聲相喧萬杉路隔煙霞洞獨木橋通楊柳村
忽然突起作險狀兩厓怪石森屏障峰迴麓轉勢復平
賈舶漁舟互來往樓臺隱隱雲中起疊嶂層巒青未已
風帆渺渺天際來咫尺渾同千萬里

題九老圖用邵二泉宗伯韻

香山老人避世人性耽沖澹樂天真招邀知己結雅社
藐視聲利同埃塵流風已遠事若新茲圖無乃傳其神
衣冠不異山中叟抱負俱為席上珍歲月悠悠幾百春

高名千載迥絕倫
廟堂勲業倘來寄
泉石襟期見在身
便欲相從一問津
撫卷令人感慨頻
浮玉山前亦可樂
澄湖碧浪涵秋旻

晚晴

薄暮開新曙
殘陽印淺沙
閒鷗明遠渡
歸鳥落飛霞
漁艇依橋泊
村帘出樹斜
登樓遣孤興
野思入眸賒

讀東坡集中有歸去來兮辭集字詩喜其用韻仍集字和之

歸去田園樂春來萬物榮親交携酒酌稚子出門迎已
覺容顏老還知富貴輕東臯足舒嘯登眺日怡情

二

寓宇疇非寄良辰不我留登丘候雲出入壑引泉流遺
世成孤往懷人賦遠遊臨風幾惆悵今日復焉求

三

富貴今非願風雲安可期得歸吾足矣不樂復何之清
趣還消酒憂懷盡寓詩委心無物我宇內幾人知

四

窈窕丘園景飛泉萬壑奔有時還問棹無日不關門
菊徑尋詩杖松風載酒尊欣欣吾自得稚趣老猶存

臨湖書屋

結廬傍湖住雅興復如何雲物蕩宵次煙莎引興多
虛明開夜榻沆瀣吸清波老去無塵事時聽孺子歌

和黃小峰大戶同韋南苔少叅遊吳山寺

一徑青林外諸天翠藹重石應聽佛法松不受秦封喜

有賓朋共更多童冠從獨憐三箸老高興未能從

二

山轉還宜寺林幽不見人此中真淨土何處有纖塵松
島涼生夏花源杳入秦慚無買山價吾欲與之隣

三

塔影浮溪上鐘聲出樹間空庭雙鳥下落日一僧還泉
響千山雪嵐飛兩岬山何須到昏黑絕頂已窮攀

次韻答黃小峰

蒼弁峰頭履清苔溪上槎餘生只山水吾性本煙霞適
意風前枕驚心夢裏笳閒門無客到綠草任教遮

又

避客常懸榻耽詩不到家鋤雲時種藥分月夜煎茶踪
跡寰中梗勲名鏡裏華棋枰與書卷樂事豈須賒

淨慈寺次金近山內翰韻

南屏幽勝處秋日此躋攀路轉橋通寺峰迴塔映山繞
堤松栢古懸磴薜蘿間悵望平湖渺長空一鳥還

次韻答李半谿夜宿壺宮

炎歊秋未退十日不塵門忽在中阿駕來過下若村薇
花叢映戶荷葉亂翻盆聊把棋枰對幽懷得細論

次石岐韻

再入峴山寺同觀蓓蕾花山光如夙昔秋色感年華樵
徑通林莽漁舟倚岬沙別歸猶戀戀信宿借僧家

詠魁星燈

熒熒精采散中庭幻出華燈肖鬼形自是文明昭景象

謾誇機巧奪玄冥斗杓指處光搖紫天祿携來馘吐青
坐覺三垣真可即此心長拱北辰星

看僧鞋菊用舊韻

去年今日賞僧鞋又是秋風一度開豈有靈根通佛性
欲憑行脚見如來緇塵洗盡元無染浮世看殘莫浪猜
仕路羊腸俱踏遍寧將晚節共深悲

泉石

野人不作繁華夢只愛山間泉石清掃處亂雲黏帚重

汲來新月注壺明
卧聽漱月醒塵耳
坐拂蒼苔解宿醒
莫道膏肓已成癖
此中幽趣有誰爭

六疊韻答徐半谿

隔林啼鳥自間關
驚起幽人夢裏閒
渴思欲吞雲夢澤
卧遊應徧武夷山
但將俗念拋千劫
未達仙階只一間
莫訝忠能真獠獠
由来佛性不拘蠻

九疊韻答徐半谿

空堂寂靜類禪關
恠底詩逋攬却閒
往事已俱隨逝水

新題恨不徧名山風高哀雁來天外月冷鳴蜩繞砌間
自覺此身成市隱欲將踪跡混漁蠻

秋熱頓涼答半谿

高木蕭蕭動野煙夜堂孤坐一燈懸新愁到枕還今夕
往事驚心又隔年勲業已慚青鏡裏情懷聊放綠尊前
莫嫌眼底炎涼變安分隨時自泰然

漳水合流為張西林郡守賦

千山飛瀑響雷車雨後洪濤勢轉加萬頃白迷沙嶼淼

自序
卷之六十五
一泓青抱石林斜，杜陵垂釣宜添檻。漢使窮源擬泛槎，
底用凭欄賦秋水。豪吟已屬大方家。

贈僧正宗

有僧自云遊雪峰，住錫寶溪之琳宮。要參無上菩提果，
已悟閻浮世界空。三餐飯食只平等，一點念頭常守中。
笑我六根猶未掃，夜燈相對講圓通。

登南高峰次江石南大叅韻

層梯百折紫霄通，合是東南第一峰。今古山川有吳越，

乾坤身世本萍蓬樓臺掩映諸天迥煙霧微茫八極空
豈有長才能作賦不禁豪思欲凌風

沈五峰郡博往松江視其乃壻清浦縣學諭

王君詩以贈之

君乘一舸觀東海木落三江正杪秋千古宮牆開創典
百年心印有傳流村墟遠近魚成市沙島微茫蜃吐樓
擬賦雄文招二陸歸持新稿示交遊

丙午春社賀施南村韻

新春今日始登山老息機塵分外閒尋壑步循岡腹上
看雲坐憩石唇間高情何幸逢三益大道無緣覓九還
秉燭傳杯盡餘興倩人扶醉下孱顏

丁未春社和蔡白石韻

翠微深處鎖禪關蘿薜層層春自閒樹杪歸雲迷洞口
竹根流水度花間晴波白淼鷗邊渡拳石青浮水上山
逸老新堂開地主清秋絕嘯會應攀

次韻簡劉南坦司空

秀野堂前只茹蔬要將高節勵頑夫詩工漢魏還窺雅
字寫鍾王不學蘇角里移家東海嶠寒山寄跡國清厨
只愁物色玄纁到重見逍遙衣錦狐

自述

墻下栽桑園植蔬溪山隨處着狂夫雨流新水堪供釣
春滿空庭不雜蘇價乏每憂新似桂豪華浪說蠟炊厨
簾衣糲飯餘生足不慕田文表白狐

重過桃源

洞口桃花春復春山川如舊歲華新
漁郎去後已迷路太守來時不見人
豈識封疆今屬晉止知先世為逃秦
只因誤讀淵明記欲把柴桑亂却真

懷化驛觀前年和韻舊作又辱張東沙諸公見和墨
跡在壁宛然如新光陰不再悵然有感

衰年起廢復窮邊清夢猶依雪上田路仄只愁人墮塹
山深長似管窺天悶呼濁酒聊成醉倦倚肩輿亦當眠
寄與西湖雙白鶴好脩毛羽待逋仙

鮎魚堡戲詠

巨口孱顏枕碧湍，猶如砥柱立江干。
肖形何不歸湖海，奮力安能上竹竿。
風鬣時隨元氣動，鱗鱗長帶雪花寒。
等閒肯落任公餌，瘴雨蠻煙自飽餐。

東坡月潭寺雲泉閣次韻

石壁穹窿半倚天，停驂午餉更攀緣。
可堪遠地重為客，欲向空門一問禪。
寺對澄潭涵夜月，窗搖古樹落雲泉。
追思往昔曾經此，屈指而今十五年。

安莊白水用韻

素練飛飛向壑奔何年神禹鑿龍門青天作雨千蛟舞
白日行空萬騎屯鼓動雷聲山欲裂撼搖坤軸地應翻
可憐不在中州地遺向窮邊自曉昏

墨川為寫竹簷生賦

老龍朝吸研池乾飛落晴波漲黑湍半醉濡毫一揮灑
滿堂風雨渭川寒

南園為醫士徐霖賦

城市山林趣亦饒
野亭叢桂自逍遙
呼童掃葉供茶竈
對客分泉灌藥苗

丙午春社悼朱雪峰秋官

浮玉山前煙浪生
峴山寺下雨冥冥
登臨不見去年伴
愁對遠峰空自青

附

徐問

字用中武進人弘治壬戌進士南京禮部尚書

朔風

朔風起青蘋
平林迹如掃
驚塵暗天過
天柱歌欲倒
玄

景忽西馳嚴霜變秋草塞雁雲中來一舉千里道物類
尚有知自信苦不早胡為中夜心屏營復如擣

哀征夫

清霜苦寒月遙遙赴轅門關城羽書疾濟洛風塵昏草
木變行色四野但空村山深道且阻人馬罷追奔枵腹
事已決欲報明主思哀哉經戰地不返征夫魂

池上即事

風清池上軒虛窗拂晴几及茲簿書暇而喜事國史列

樹淹斜陽返照光在水獨坐惜餘陰鑑影時見履物理
觀定時吾心本如是

和孫太守朝望登毘盧閣

與客登層臺鉤簾看幽壑秋色動遠林千厓自空廓俯
視清川流或見沙鳥落涼飈拂襟袂閒雲浮飛閣積案
苦相仍對此聊自樂吳山亦佳麗登臨忽疑昨書臺藤
蘚荒伊人久云邈餘香有叢桂三嗅風前萼勗哉千古
心勿俾利名縛

次毛給事式之秋暮見懷

大鈞無停運秋色到江渚天清白露下城急夜深杵幽
人憫留滯緘書寄南楚野鶴非舊林颯爽意斯舉同心
泝千里歲月復幾許讀罷瑤華音惆悵不得語

歲暮

海濱歲云暮草木尚蒼蒼玄枵隱化機羣蟄寂餘響誰
云果不食有復繼茲往充然天地心生息在反掌況乃
青陽交和風徧穹壤陽德嘉再亨吾亦解吾養重闢靜

喧囂性定道心長百年日斯征撫事集遐想惟當務崇
德不愧茲俯仰

江南別送毛給事吳行人蔣進士

春寒寂寂花事遲驛樓弱柳青垂絲玉瓶酒盡客不醉
東風惆悵令人思問君此行去何極共說毛君司諫職
直詞慙諫昔回天子時時借顏色吳君仗節中州
行驂駟骨格衆目驚歸來起居北堂下漢槎又促趨巖
程蔣君年少拾高第要路勲名行遠致終孝三秋宰木

長細草新蒲亂愁思可憐去後凡馬空到時花發燕山
紅各言相離會何日長笑百年成轉蓬愧予衡茅守儒
素貧病無書問親故心隨河水轉北流回首斜陽渺煙
樹

送王伯存守雷州

雷陽古城瀕海曲路入炎荒奠南服長安萬里化不流
故遣郎官領符竹郎官久負卓犖才一麾五馬從天來
鴻名欵到遠人耳旆旌雙引煙雲開縈紆山縣雞聲早

候火煌煌連古道十賢名在祠宇荒君去還須問遺老
我懷同舍心悠悠夕陽望斷江楓秋天空海濶會何日
聚首還期鷓鴣樓

寄功甫歸隱東麓

孤塵積翠連雲起北走金陵枕江水山形繚繞如蜿蜒
中有幽人隱居里芙蓉石室開葱龍赤日照耀神仙宮
山雞野鶴自啼舞長林聲散洪濤風主人歸來禾頭白
卜築緣山傍川脉歌詞洗盡沙土痕野堂愁絕鶯花魄

金史四庫全書
卷四百八十五
知君獨往歲月長戶庭哀壑流輝光安得驅我置汝傍
東山孤高遙相望

題顧氏畫

美人踪跡置何許秋色蘆花共江渚碧水常浮隱者雲
青丘獨聽孤鴻語知君畫圖心更幽一幅寒煙鎖平楚
家法莫是虎頭傳坐對猶能洗殘暑

憩惠山聽松閣雨

山雨正冥冥山僧開翠屏水拖千澗白雲約半峰青石

髓分茶鼎塵心靜佛經松風坐來定餘韻遶簷楹

卧病

竟日還欹枕秋風動客歌青山愁處遠白髮病來多
生計只書卷故園空薜蘿時時問雙鯉欲寄洞庭波

早發煙渚

雨色江頭樹青煙夾路長遠村迥寂寞白鳥去微茫
楚客歸何日春江正可航即思雲嶠句心折不成章

楊村大風

仲冬天氣肅足馬向河干林撼風聲厲沙昏日色寒驅
馳竟何意漂泊不成歡天地無情者誰憐遊子難

哭新昌尹董宗遠

萬里春猶至三江雁不歸經年鄉信少昨日故人非單
父絃初絕河陽花漸稀寧知滄海上東望自沾衣

龍門驛

險仄灘江峽龍門驛路通軍麾沙水上春色瘴煙中深
樹藏豺虎窮荒絕雁鴻天山勛亦壯吾欲挂彫弓

喜官軍狼山破賊

大夫本意重橫行，况復東南劔戟鳴。
落日城頭寒角起，秋風葉落陣雲橫。
潢池莫道多豺虎，范老從來富甲兵。
一夜天狼蕩妖氣，羽書先奏大江平。

送嚴翰林還京

鈴山太史舊比鄰，十載思君白髮新。
詞翰早開三殿色，旌旗今發九江春。
沙邊別意憐芳草，天外羈愁望紫宸。
為報中朝知己道，江城凋敝只宜貧。

紀夢

誰將潦倒向人前
生計惟餘養鶴田
五十功名塵土外
四時清夢楚雲邊
黃花乍浥初寒露
白鶴孤飛欲曙煙
撫事未須煎百慮
強依消息渡流年

和太和再至梧州

我行百粵天應盡
北指浮雲是日邊
春意不緣荒戍隔
官曹常得故人連
晴川水濶魚龍戲
瘴嶺煙消虎豹眠
便欲尋湘從此去
南山東望思悠然

袁州公館和壁間韻

苦雨頑雲晝不開
宜春空有望山臺
三秋物色臨吳盡
萬里干戈入楚來
感舊獨懷江樹月
登高多負菊花杯
平生不盡憂時意
那羨徒歌郢下才

贈朱得之

當年腹笥傾多士
百戰文場老息機
紫綬金魚心落莫
丹丘瑤草路依微
湖邊春色浮新蟻
檻外晴光動舞衣
莫向山中論歲月
仙遊應與世人違

晚渡

霜白城下寒江空
夜船渡蘿月轉林微
照見行人路

見梅

仙子新裁白練衣
淡粧猶自愧芳菲
隴頭久識殷勤意
今夜月明花莫稀

虎丘懷古

虎丘山塔倚天開
吳苑離宮徧草萊
舊日繁華何處是
松風長寫後人哀

吳門寄楊君謙

吳下才名海內知，
挂冠誰赴北山期。
門臨水國秋潮早，
添得新波入研池。



石倉歷代詩選卷四百八十五